

Хальмг келнэ тӱрӱр кегдсн таньгъчин хург

Июнин 3-4-д Элстд, Хальмг таньгъчин келнэ, литературин болн тууджин научн-шинджлгънэ институт хурасн келнэ тӱрин туск хург болв.

Хургт келнэ тӱрин специалистр—профессор Б. К. Пашков, филологическ науки кандидатр, доцент А. П. Конаков, И. К. Илишкин, А. Сусеев, Л. Жигжанова, математическ науки кандидат П. Эрдниев орлицхав. Ставропольск педагогическ институтас преподавательмуд—доцент Б. Бадмаев, У. Очиров, Черкесск педучилишин преподаватель—А. Кичиков, Хальмг таньгъчин келнэ, литературин болн тууджин научн-шинджлгънэ институтин келнэ туск секторин заведующ С. Каляев, багшнрин медрл ӱдлӱлгънэ Хальмг таньгъчин институтин директор Д. Павлов, таньгъчин эрдм-сургуулин отделин, редакцин, радиовещанэ кӱдлачнр, хальмгин бичӱчнр болн таньгъчин хальмг келнэ багшнр орлицхав.

Хальмг таньгъчин келнэ, литературин болн тууджин научн-шинджлгънэ институтин директор профессор Б. К. Пашков ахр ӱг келдж, хургиг секв.

Хургин кӱндврт: „Хальмгар чикӱр бичлгънэ тускар“ И. Илишкин доклад кев. Д. Павлов эн тӱрӱр немӱр доклад кев.

Кӱндгдсн тӱрӱр цуг бийн 20 кӱн босдж ӱг келцхӱв, тертоод доцент Бадмаев, пединститутин преподаватель Иширов, Черкесск педучилишин преподаватель Кичиков, Хальмг таньгъчин келнэ, литературин болн тууджин институтин келнэ туск секторин заведующ, бичӱч Каляев, болн нань чигн улс хальмг келиг цааранднь ӱргдӱлх сӱн селвгӱн ӱгцхӱв.

Эн хургт КПСС-н Хальмг обкомин пропагандин болн агитацин отделин заведующин дарук ӱр А. Бадмаев, Хальмг таньгъчин сургӱль-эрдмин отделин заведующ ӱр П. Сагаджиев орлицхав.